

萬 有 文 庫

第二集七百種

王 雲 五 主 編

讀 史 方 輿 紀 要

(六)

顧 祖 禹 輯 著

商 務 印 書 館 發 行



讀史方輿紀要

(六)

顧祖禹輯著

國學基本叢書

讀史方輿紀要

卷十五

直隸六

順德府。

東至廣平府清河縣三百三十里。南至廣平府百二十里。西南至廣平府邯鄲縣百一十里。西至山西遼州二百四十里。西北至真定府井陘縣二百里。北至真定府趙州百五十里。自府治至京師一千里。

禹貢冀州地。殷祖乙遷于邢。卽此。周爲邢國。

史記魯世家成王封周公子苴爲邢侯。

春秋時并于衛。後入于晉。戰國時屬趙。秦

爲鉅鹿、邯鄲二郡地。秦末謂之信都。項羽又改爲襄國。

二世二年張耳陳餘立趙歇爲趙王居信都。秦亡項羽分趙地立張耳爲常山王都襄國。羽更信都爲襄國也。漢屬

鉅鹿、常山二郡及趙、廣平二國。後漢因之。晉爲鉅鹿、趙二國地。其後石勒都于此。石虎改置襄國郡。後

魏爲鉅鹿郡及北廣平郡地。隋改置邢州。煬帝改曰襄國郡。

竇建德嘗置廣州于襄國。唐紀武德四年并州總管劉世讓攻建德自土門而東克其黃州進攻洺州不克。蓋

誤廣爲黃也。

唐後爲邢州。天寶初曰鉅鹿郡。乾元初復故。

上元以後邢州統于昭義鎮。中和二年鎮將孟方立遷治于此。自是昭義分爲二鎮。李克用得之仍置邢洺節度治焉。兼領洺磁二州。

五代梁置保義軍治此。唐曰安國軍。

朱溫得三州。改置保義軍。貞明二年。為晉王存勗所取。改曰安國。

宋仍為邢州。

亦曰鉅鹿郡。

宣和初。升為信德府。

金復曰邢州。

仍置安國軍。

元初為順德府。

置元帥府于此。尋改安撫司。

至元初。又改為順德路。明曰順德府。領縣九。

府西帶上黨。北控常山。

常山謂真定府。

河北之襟要。而河東之藩蔽也。秦之季也。章邯去楚而攻趙。鉅鹿一敗。

秦不復振。韓信戰勝。舉趙。自趙以東。曾無堅壘。張賓說石勒曰。襄國依山憑險。形勝之國。得而都之。霸王之業也。自是幽冀多故。輒爭襄國。唐初。竇建德。劉黑闥。相繼據洺州。縱橫河北。議者謂自河東下太行。拔邢州而守之。則洺州之肩背舉。而河北之腰脅絕矣。魏博叛帥田悅。嘗言邢磁如兩眼在腹中。不可不取。磁州見河南邢洛磁三州境皆相接。唐以昭義一鎮。控禦河北。而邢州尤為山東要地。雖強梗如鎮魏。猶終始羈縻。

者。以邢州介其間。西而兵力足以展施也。李克用以河東爭河北。數出邢州。朱溫得之。則用以蔽遏河東。迫脅鎮定。及晉王存勗合鎮定以圖梁。梁人戰守。尤以邢州為切。

其後洛魏相磁諸州。悉屬于晉。邢州始下。

邢州不守。而河北

之勢。盡折而入于晉矣。李忠定公曰。邢州與河東之定州。皆地大力豐。東西相峙。如太行之兩翼。往來走集。道里徑易。從邢州而西北。路出井陘。可以直搗太原。從邢州而西南。路出邯鄲。可以席捲相衛。若

道慶源。即趙州而取深冀。越清河而馳德棣。如振裘者之挈其領也。此韓信得之。遂以掇拾燕齊。石勒據

之。因以并吞幽冀歟。

邢臺縣。

附郭古邢國。秦爲信都縣。項羽改爲襄國。漢亦爲襄國縣。屬趙國。後漢因之。晉屬廣平郡。後魏永安中改屬北廣平郡。隋開皇九年改爲龍岡縣。十六年置邢州治焉。唐因之。宋宣和二年始改曰邢臺縣。今編戶二十八里。

襄國城。

在今城西南。殷祖乙遷都于邢。卽此城也。春秋時邢侯都于此。爲衛之與國。隱四年石碯殺州吁。衛人逆公子晉于邢而立之。閔元年狄伐邢。齊人救邢。僖元年狄復伐邢。齊侯帥諸侯之師以救邢。遷邢于夷儀。二十五年衛侯燬邢。二十八年晉

伐衛。是時邢爲晉所取。哀四年齊國夏伐晉。取邢。旣而邢復入于晉。戰國爲趙邑。秦滅趙。置信都縣。秦末趙王歇都此。項羽使張耳都之。改爲襄國。自是歷漢及晉。皆爲襄國縣治。石勒據之。亦謂之建平城。後趙錄石勒由石門進據襄國。後擒劉曜。盡得關隴。乃僭號建平。大修城郭。因徙洛陽銅馬翁仲二。列于永豐門。謂其城曰建平城。十六國春秋。勒擒劉曜。至襄國。舍曜于永豐小城。蓋卽永豐門外耳。元豐志。建平城石勒所築。卽今邢州城。非也。冉閔滅趙。劉顯復稱帝于襄國。晉永和八年閔攻滅顯。因毀其城垣。是後襄城廢入任縣。後魏太和二十年復置襄國縣。移于今治。魏收志。襄國縣有襄國舊城。是也。又隋志。後齊廢易陽縣入襄國縣。置襄國郡。後周改襄國曰易陽。別置襄國縣。隋開皇初郡廢。易陽今廣平府之廢臨洺縣。似襄國改徙非一處矣。宋白曰。隋以易陽還故治。而襄國亦仍理舊城也。宋沈括筆談。邢州城郭。進守西山。時築闊六丈。可臥牛。俗呼臥牛城。一說城東有牛尾河。因名也。今城明朝因故址修築。周十二里有奇。

青山城。

府西北八十里。其地近青山。本名青山口。隋開皇十七年。因置青山縣。大業初。省入龍岡縣。唐武德初復置。屬邢州。開成五年。省入龍岡縣。仍爲設險處。乾寧五年。朱全忠會魏博帥羅宏信兵。擊李克用。至鉅鹿城下。敗河東兵。逐北至青山口。于是

全忠遂取邢。洛磁三州。既而克用遣李嗣昭等出青山。將復山東三州。進攻邢州。爲汴將葛從周所敗。退入青山。從周追之。將扼其歸路。李嗣源擊却之。光昭三年。李嗣昭拔洛州。朱全忠引兵來爭。嗣昭棄城走。葛從周設伏于青山口。邀擊嗣昭大敗。後唐清泰三年。唐兵攻太原。爲石敬瑭及契丹所敗。詔天雄帥范延光將兵由青山口取榆次以救之。卽此也。榆次今山西屬縣。

夷儀城。

府西四十里。春秋僖元年。狄伐邢。齊桓公遷邢於夷儀。或曰。今山東聊城縣之夷儀聚也。杜佑曰。龍岡縣北百五十里。夷儀城卽左傳邢國所遷。有夷儀城。俗譌隨。宣城。寔字記。夷儀山在邢州西北一百五十七里。今詳見山東聊城縣。

封山。

府西二十里。志云。以邢侯初封此而名。亦謂之西山。今自封山以西。綿延數百里。直接太行。皆西山矣。五代梁開平五年。晉王存勗自柏鄉乘勝攻邢州。全忠遣將徐仁溥帥兵自西山夜入邢州。助保義帥王檀城守。蓋乘高而下。則晉兵不及備也。又西

十里曰孤山。斗絕多石。

其旁平坦可以耕藝。

百巖山。

府西北百三十里。山高險。有巖百餘。郡境諸山之望也。又鵠山在府西北百十里。岡巒鵠起。上有穴。出雲母。○馬鞍山在府西北三十七里。山脊隆起。其南有泉。曰金泉。北曰玉泉。又府西北三十里。曰仙翁山。唐天寶中。元宗錫以今名。時張果遊憩

于此也。又有百花山。在府西南四十

二里。巨石巖巖。山色青白相間。因名。

馬嶺。

府西北百三十里。其地峻險。有馬嶺口。爲戍守要地。唐天祐三年。河東帥李克用遣其將李嗣昭攻邢州。朱全忠將張筠引兵助守州城。因設伏於馬嶺。嗣昭至。爲筠所敗。遂引還。

黃榆嶺。

府西百二十里。亦設險處也。嶺北有陳宋口。五代梁天化五年。劉鄩以晉兵在魏州。因潛師出黃澤嶺。西襲晉陽。晉將周德威聞之。自幽州將千騎救晉陽。至土門。鄩已整衆下山。自邢州陳宋口踰漳水而東。屯于宗城。嶺下多陳宋二姓所居。因以

爲山口之名也。黃澤嶺見山西遼州。

琉璃坡

府南三十餘里。西山垂盡。岡脈起伏處也。唐龍紀初。李克用上黨而東。攻孟方立于邢州。拔磁洛二州。敗方立兵于琉璃坡。進攻邢州。又景福二年。克用攻李存孝于邢州。從欒城進屯任縣。使李存審引軍屯于琉璃坡。蓋備存孝之南走也。○石

井岡在府西北七里。上有井。大如車輪。相傳漢世祖營軍時所

鑿。石勒改爲龍岡。隋因以名縣。又有鹿城岡。在府北十五里。

漳水

府東南八十里。自廣平府曲周縣流經府境。入平鄉縣界。又北歷南和任縣。合澧河而北入趙州隆平縣界。五代梁乾化四年。晉王存勗會兵攻邢州。梁將楊師厚自魏州赴救。營于漳水之東。胡氏曰。師厚蓋營于平鄉縣南也。詳見大川漳水。

百泉水

府東南五里。自平地湧出。其脈甚多。故曰百泉。蓋卽澧河之上源。引流而東入南和縣界。又東北經任縣東入趙州隆平縣。而匯于胡盧河。又有七里河。在府南七里。流合于百泉水。志云。百泉水一名渦水。又名鴛鴦水。隋志以爲灑水也。

達括水

府西北五里。舊名鑿水。出石井岡。流經任縣。爲蔡河。合于澧河。又有野河。在府西北百二十里。發源百巖諸山。引流凡七十二道。下流亦會于澧河。

黃榆關

在府西北黃榆嶺上。據險築堡。爲戍守處。志云。黃榆嶺口有腰水。最高峻。其上平闊。惟一徑可通。腰半有水。因名。又香爐峯。在黃榆嶺北。峯巒高險。狀如香爐。惟一徑可達。舊置營于此。皆有官兵戍守。又北卽趙州贊皇縣界也。○馬嶺口在馬嶺

下。亦有堡。與黃

榆關相爲犄角。

張公橋

在府西北。或云。其下卽野河所經。舊爲通道。唐末。李克用爭河北。每出青山口。必經張公橋。然後至邢。洛諸州。天祐三年。梁將葛從周敗晉兵于沙河。追至張公橋。五代梁乾化四年。晉王存勗會兵於趙州。南攻邢州。至張公橋。是也。

檀臺

在府境。徐廣曰：襄國縣有檀臺。史記：趙成侯二十年，魏獻榮椽，以爲檀臺。蓋在此。○偏店在府南，近時賊犯府境，官軍敗之于此。

沙河縣

府南三十五里。南至廣平府邯鄲縣八十里。漢襄國縣地。隋開皇十六年析置沙河縣。屬邢州。唐武德初置溫州于此。四年州廢，仍屬邢州。今編戶十九里。

沙河舊城

縣東一里。隋置縣于此。唐武德五年，世民擊劉黑闥于洺州。幽州總管李藝引兵會戰，黑闥留兵守洺州，自將兵拒藝。夜宿沙河。乾元二年，官軍與史思明戰于相州之安陽河，會大風晦冥，官軍潰而南，思明亦潰而北。至沙河，尋還屯鄴南。五

代晉開運初

縣移今治

湯山

縣西北七十里。下有湯泉。山海經：此湯愈疾，爲天下最。故以名山。又黑山在縣西北四十里。山石多黑，故名。舊志：黑山，襄國之名山也。

磬口山

縣西南九十八里。盧毓曰：淇陽磬口，冶鑄利器。漢魏時舊鐵官也。今縣有綦陽鎮，置鐵冶司于此。蓋卽漢魏之故址。隋志謂之磬山。

沙河

在縣治南。源出湯山，一名澗水，繞流經縣南。又東南流入廣平府永年縣界。澗讀曰容。水經注：澗水出襄國縣西山，昔牛缺遇盜于沙澗之間，是矣。西山卽湯山也。

倉門

縣西南百二十里。志云：唐太宗爲秦王時，擊劉黑闥于河北，置倉於此，以通餽餉。故有倉門之名。或曰：建中年間，昭義帥李抱真與河北叛帥田悅等相持，因置倉以供軍處也。亦謂之倉口。

南和縣

府東四十里。東至平鄉縣四十里。漢縣。屬廣平國。後漢屬鉅鹿郡。晉屬廣平郡。後魏因之。永安中，分置北廣平郡治此。高齊省入廣平郡。後周分置南和郡。隋初郡廢，縣屬邢州。唐武德初置和州。四年州廢，縣仍屬邢州。今編戶十三里。

漳河。在縣東北自平鄉縣合沙洛諸流入縣境。又西北會于澧河而入任縣界。○澧河在縣西十里。其上游卽百泉水也。自邢臺縣流入境。漳水及沙洛諸川俱流合焉。又東北流而入任縣境。

泚水。縣西北十五里。志云。其上游自趙州臨城縣分流入唐山縣界。折而西南。經任縣內邱縣境。又東南流至縣界。邢臺縣之達括河亦流經縣西。合于泚水云。蓋泚水伏見不常。自臨城縣流合沙河。復分流而南出於郡境者也。○浪溝河在縣南五里。沙洛

二河合流以後。旁出者爲狼溝河。下流仍合於澧河。志云。河兩岸多狼因名。

任縣。府東北四十里。又東北至趙州隆平縣六十里。漢置任縣。屬廣平國。後漢屬鉅鹿郡。晉屬廣平郡。後魏因之。永安中。改屬北廣平郡。高齊時縣廢。隋開皇十六年。復置。屬邢州。大業初。廢入南和縣。唐武德四年。復置。仍屬邢州。今編戶十三里。

古任城。在縣東南。顏師古曰。任本晉邑。春秋襄三十年。鄭羽頡奔晉。爲任大夫。哀四年。齊國夏伐晉。取任。卽此地也。後爲趙邑。漢因置任縣。劉昫曰。晉故置任縣。本漢鉅鹿郡南鄉縣也。其後廢置不一。唐武德四年。復置於故苑鄉城。尋移今治。會昌三年。討

澤潞叛帥劉稹。成德帥王元逵。次臨洛。略任及堯山。景福二年。李克用攻叛將李存孝於邢州。自欒城進屯任縣。卽今縣矣。

苑鄉城。縣東北十八里。本漢南鄉縣地。後爲閑廐之所。謂之苑鄉。晉永嘉末。廣平人游綸等擁衆於苑鄉。時石勒據襄國。遣其將麴安等攻敗之。又永和五年。石虎子遵篡立。其兄沖起兵幽州。討之。至常山。軍於苑鄉。尋敗死。志云。苑鄉。石勒置縣於此。又改

爲清苑縣。屬襄國郡。後魏時廢。魏收志。任縣有苑鄉城。是也。

渚鄉城。縣西南二十七里。本漢之張縣。屬廣平國。後漢縣省。俗謂之渚鄉城。晉永嘉末。幽州刺史王浚遣兵及遼西鮮卑段疾陸眷等。攻石勒於襄國。屯於渚鄉。卽此城也。鄉在澤渚之陽。故曰渚鄉。

龍岡山

在縣南志云其山岡脊橫互東西長二十里蓋西山之脈蜿蜒於郡北與石井鹿城諸岡互相接續也或曰此山舊在邢襄縣境內故隋以名縣

澧河

縣東十五里自南和縣合漳河以及羣川流入縣境水勢曼衍頗有漲溢之患又東北入隆平縣之大陸澤元初郭守敬言澧河東過任縣失其故道淹沒民田千餘頃若開修成河其田即可耕種因命有司浚導明亦嘗修治焉

蔡河

在縣治南其上游即邢襄縣之達括河也流至南和縣西會于泚水復東北流入縣境謂之蔡河又東注于澧河

內邱縣

里。府北五十五里東北至趙州柏鄉縣六十里漢置中邱縣屬常山郡後漢屬趙國晉因之石趙嘗置中邱郡于此又改置趙安縣後魏復曰中邱太和中屬南鉅鹿郡孝昌中屬南趙郡隋改曰內邱屬邢州唐初改屬趙州貞觀初復屬邢州今鉅戶十八

中邱城

在縣東漢縣治此魏收曰晉亂後改廢太和二十一年復置中邱縣今中邱故城是也隋讜忠因改曰內邱唐因之光化三年朱全忠遣軍攻幽滄李克用遣李嗣昭攻邢洛以救之敗汴兵于內邱又敗汴兵于沙河遂克洛州五代漢乾祐末契丹

寇陷內邱即今縣治矣

青山

縣西二十里志云初亦名黑山後周時始改曰青山山岡隴綿延與太行相接為郡境之險隋置青山縣以此唐曰青山口詳見邢襄縣之青山城

櫻山

縣西北十二里山峯巖錯峙勢如搏攬因名礪水出于此又蓬鵠山在縣西六十三里亦名龍騰山以山有騫舉之勢也龍騰水出焉○孤山在縣西北十七里挺然獨峙旁無支阜唐天寶中賜名曰內邱山

泚水。在縣東南。自唐山任縣境內。西南流經縣界。復折而東南。入南和縣境。又沙溝水在縣西南。源出龍騰山。引而東。合于龍騰水。東北流入唐山縣界。合于泚水。又礪水。源出攬山。其水可以礪刀劍。因名。亦曰礪溝水。一名渚水。下流入沙溝水。

燒梁關。在縣西。舊爲控扼之處。晉書地道記。中邱縣有燒梁關。

石門塞。在縣西北。晉書地道記。中邱縣有石門塞。紀勝云。石門塞。邢州之險要也。晉時石勒遣石季龍進據石門。因取襄國。五代初。晉王存勗以張文禮之亂。自石門趣鎮州。卽此矣。寰宇記。邢臺縣有石門山。金人疆域圖因之。誤也。

唐山縣。府東北九十里。北至趙州柏鄉縣三十五里。東至趙州隆平縣五十里。漢置柏人縣。屬趙國。後漢及晉因之。後魏屬趙郡。孝昌中。改屬南趙郡。高齊改縣曰柏仁。隋屬邢州。唐武德初。置東龍州。四年。州廢。改屬趙州。貞觀初。還屬邢州。天寶初。改爲堯山縣。

宋因之。熙寧六年。廢。元祐初。復置。金人改縣曰唐山。仍屬邢州。今編戶一十四里。

柏人城。縣西十二里。春秋時晉邑。哀四年。晉荀寅奔鮮虞。齊弦施會鮮虞。納荀寅于柏人。五年。晉圍柏人。拔之。史記。趙王遷元年。城柏人。漢因置柏人縣。高祖八年。擊韓王信餘寇。過趙。趙王張敖相賈高等。以帝數謗罵王。謀爲亂。帝還過柏人。欲宿心動。問

縣何名。曰柏人。帝曰。柏人者。迫于人。也不宿而去。光武初。破王郎將李育于柏人。晉建興三年。石勒自襄國襲王浚于幽州。以火宵行至柏人。後魏主宏太和十八年。南巡。謀遷都。羣臣或請都鄴。魏主曰。鄴西有枉人山。東有列人縣。北有柏人城。君子不欲盜泉。惡其名也。蓋亦以柏人爲迫人矣。皇甫謐曰。柏人城。堯所都。魏收志。柏人縣有柏人故城。或以爲今治。卽後魏時所遷矣。唐天寶初。改縣曰堯山。景福初。李克用侵鎮州帥王鐸。鎔合幽州兵。拒克用於堯山。克用遣將李嗣昭擊敗之。卽今縣也。又柏鄉城。在縣東北十八里。魏收志。柏人縣有柏鄉城。城家記云。亦堯所築也。

堯山

縣西北八里。相傳堯始封此。因名。其東麓一名宣務山。又名虛無山。山經宣務山高一千八百五十丈。出文石。五色錦章。昔堯登此山。東瞻洪水。務訪賢人。因名。○干言山在縣西北五里。詩衛風出宿於干。飲錢於言。寰宇記以爲卽此山也。隋志內邱縣

有干言山。金志亦云。山在內邱縣。或

曰。山延袤數十里。西接內邱縣界。

鶴度嶺

縣西百七十里。志云。嶺最高。惟鶴可度。故名。南去邢臺縣馬嶺僅三十五里。俱爲兵防要口。○光泰岡在縣西二里。廣一里。袤數里。相傳光武破李育於此。

泝水

縣西二里。其上游自趙州臨城縣東南流入境。至縣西復折而西南。經任縣之西北。內邱縣之東南。遠近諸川流多附入焉。

宣務柵

在堯山東麓。唐昭義鎮所置戍守處也。會昌三年。劉稹以澤潞叛。詔諸道兵進討。成德帥王元逵以兵守臨洺。掠堯山。旋奏拔其宣務柵。因進攻堯山城。劉稹遣兵來救。元逵擊却之。蓋宣務柵與縣相層。齒云。

平鄉縣

府東南八十里。南至廣平府六十里。西南至廣平府雞澤縣二十里。秦鉅鹿縣也。漢因之。爲鉅鹿郡治。後漢仍屬鉅鹿郡。晉屬鉅鹿國。後魏初因之。景明二年。改置平鄉縣於此。孝昌中。屬南趙郡。隋初郡廢。縣屬邢州。唐武德初。置封州。四年廢。還屬邢州。

宋因之。熙寧六年。省入鉅鹿縣。

元祐初復故。今編戶十三里。

鉅鹿城

今縣城也。秦二世二年。章邯北渡河擊趙。趙王歇。張耳。陳餘皆走入鉅鹿城。章邯令王離。涉間圍鉅鹿。章邯軍其南。築甬道而輸之粟。陳餘將卒數萬人。軍鉅鹿北。所謂河北之軍也。三年。楚上將軍項羽引軍渡河救鉅鹿。大破秦兵。諸侯軍救鉅鹿

下者十餘壁。莫敢縱兵。章邯兵數却。遂以兵降楚。卽此鉅鹿也。括地志。漢鉅鹿郡故城在平鄉縣北十一里。故鉅鹿縣城卽平鄉縣治也。

平鄉城。縣東南二十里。晉泰始初分鉅鹿縣置平鄉縣。屬趙國。尋廢。魏收志。景明二年。復置平鄉縣。治鉅鹿城。屬南鉅鹿郡。後改屬南趙郡。縣有平鄉故城。是平鄉。鉅鹿。改徙之明驗也。劉昫曰。隋改置平鄉縣于鉅鹿城。誤。又邑志云。縣東二十里有艾村。相

傳其地。卽故南緣城。平鄉縣初治此。宋元符中始

遷。今治艾村。當卽故平鄉。元符遷治之說亦謬也。

棘原。在縣南。史記。項羽破秦軍章邯軍于鉅鹿南棘原。卽此。今湮。劉昭曰。鉅鹿縣南有棘原。卽章邯所軍處。

濁漳河。縣西南二十里。自廣平府曲周縣流入境。又東北經縣東十里。復折而西北流。入南和縣界。合于澧水。括地志。濁漳水卽禹

貢之橫漳。俗亦名爲柳河。史記。項羽已破秦軍。軍于漳水南。是也。朱梁時。魏博帥楊師厚以晉兵攻邢州。引兵救之。亦屯于

此。志云。今東西二十餘里。爲舊漳河。又東十二里有新漳河。漳水流濁易決。舊漳河久填淤。不能容水。每至漲溢。則西入滏陽。東入新漳。而沙沼諸流。亦不時氾濫。與漳滏諸流。合爲一壑。民被其害。蓋邑之爲地。外高中卑。浸淫所不能免也。明正統中。嘗爲堤以防之。宏治十四年。復大溢。縣令唐澤大修堤障。環繞邑境。民困始蘇。蓋川流變徙。大抵非故道矣。

沼河。縣西十里。自雞澤縣流經境內。又西五里爲沙河。志云。縣境左舒而右縮。沼河在境上。沙河在境外。此卽沙河。在雞澤縣。南流合沼水之道也。沙沼合流。俱東北出。而經縣西。至南和縣界。合于漳河。

滏陽河。縣東七里。亦自曲周縣流經境內。又北入于漳河。萬歷初。漳水挾滏陽而北出。於是舊流益亂。○落漢水在縣西南十八里。漳水舊經流此。謂之薄洛津。俗因譌爲落漢水。志以爲洛水支流也。自縣境北入南和縣界。與滏陽河合。近亦爲漳沼諸流

所併。非復故渠矣。又淤泥河

在縣東十里。亦漳水支流也。

沙邱臺

縣東北二十里。古史紂築沙邱臺，多取禽獸置其中。莊子：衛靈公卒，葬沙邱宮，戰國策：趙李兌等圍主父于沙邱宮，百日而餓死。竹書紀年：自盤庚徙殷，更不徙都。趙時稍大其邑。南距朝歌，北據邯鄲及沙邱，皆爲離宮別館。趙主父及子惠文王遊

沙邱異宮是也。秦紀：始皇三十七年崩于沙邱平臺，或曰平臺沙邱宮中之臺也。邑志：縣南五里有平臺，劉昭曰：沙邱臺在鉅鹿東北七十里。

鉅鹿縣

府東北百二十里，東北至冀州南宮縣六十里，西北至趙州隆平縣六十里，漢南轅、鉅鹿二縣地。後魏初改置鉅鹿縣，仍屬鉅鹿郡。後屬南趙郡。高齊廢，隋開皇六年復置，屬邢州。大業十年爲羣盜張金瓶所陷。唐武德初置起州，四年州廢，縣屬趙州。貞

觀初仍屬邢州。

今編戶十三里。

南轅城

在縣北。此隋之南轅城也。寰宇記：縣境卽漢南轅縣地。蓋高齊廢南轅入任縣。隋開皇六年改置于此。屬邢州。大業初廢入鉅鹿。劉昫曰：隋於漢之鉅鹿置平鄉縣，而於漢之南轅置鉅鹿縣，似爲未核。又邑志：縣北十里有舊鉅鹿城，縣本治此。唐垂

拱初因漳水爲患，徙縣於東南隅，卽今縣治。劉昫志：貞觀初，鉅鹿縣治東府亭城，嗣聖初徙今治。垂拱卽嗣聖之明年，舊城當卽東府亭城。宋國史云：元豐以後，大河益徙而北。大觀二年，河決陷鉅鹿城，詔遷縣於高地，而志不載。今城蓋宋大觀中所遷矣。輿程紀

自縣而南四十里至平鄉縣，此爲漢之鉅鹿。自縣而西五十餘里至任縣，又北至柏鄉縣之廢南轅城九十里，此爲漢之南轅縣。

白起城

在縣西南。舊傳白起攻趙，營築城於此。唐武德初置白起縣，屬起州。四年并入鉅鹿縣。又今縣南七里，有棘城，一名棘家砦。志以爲卽章邯所軍之棘原也。又有柴城，在縣東三十里。五代周顯德中所築。志云：世宗父柴守禮，本堯山人，嘗徙於此。築

城以居，因名。

今城址猶存。

漳水

舊在縣東。有大小二河。亦謂之新舊二河。自平鄉縣東北流入縣境。與廣宗縣接界。又北注於大陸澤。明天順中。漳河南徙。悉入於運河北道之流。幾絕。其後漳水餘流。自平鄉北徙。合於南和縣之澧河。不復至縣境。二河漸成平陸矣。唐史貞元中。邢州

刺史元誼徙漳水。自州東二十里。出至鉅鹿縣北十里。入於故河。民賴其利。又宋元祐初。大河

北徙。決入漳河。漲溢爲害。其後河復南出。漳亦隨之。故道多塞。蓋漳水經流。其不可間久矣。

廣阿澤

縣北五里。亦曰大陸。亦曰鉅鹿。接趙州隆平縣界。呂氏春秋。晉之大陸。趙之鉅鹿也。十三州志。廣阿澤。卽唐虞時大麓地。東西廣二十里。南北三十里。葭葦魚蟹之利。充牣其中。澤畔又有鹽泉。煮而成鹽。百姓資之。亦名沃洲。漚而復流。卽寧晉之胡

盧河也。食貨攷。漢堂陽縣有

鹽官。蓋以地近廣阿澤云。

原莊堡

縣西南十五里。往來所經。商旅輻集。舊有小城。可以守禦。

廣宗縣

府東百二十里。東南至山東臨清州七十里。西北至鉅鹿縣三十五里。漢鉅鹿郡堂陽縣地。後漢章帝分置廣宗縣。仍屬鉅鹿郡。永元五年。嘗置廣宗國於此。國尋廢。晉仍曰廣宗縣。屬安平國。石趙嘗置建興郡治焉。後魏屬清河郡。太和二十一年。置廣

宗郡。尋罷。孝昌中。復置郡。高齊時。郡廢。縣屬貝州。隋仁壽初。改曰宗城縣。唐武德四年。置宗州。九年。州廢。縣仍屬貝州。天祐初。以朱溫

父名誠。復改廣宗縣。屬魏州。後唐復曰宗城。宋屬大名府。金屬涪州。元復曰廣宗。至元初。省入平鄉。尋復置。屬順德路。今編戶十三里。

宗城故縣

卽今治。後漢置廣宗縣於此。光和末。皇甫嵩大破黃巾賊帥張梁於廣宗。晉永嘉四年。幽州將祁宏擊劉淵冀州刺史劉靈於廣宗。斬之。隋避太子廣諱。改曰宗城。唐建中末。幽州留後朱滔叛。應朱泚於長安。入縣境。以田悅不與同叛。攻宗城。

經城陷之。乾寧三年。河東將李存審救鄆帥朱瑄。攻臨清。敗汴將葛從周於宗城北。乘勝至魏州北門。五代梁乾化五年。劉鄩謀襲晉陽。不能達。自西山下至邢州。踰漳水而東。軍於宗城。以晉所蓄積。俱在臨清。謀襲之。以絕晉糧道。晉將周德威引兵追鄩。至兩宮。

詰朝略鄆營而過。馳入臨清。鄆因引兵趣貝州。五代晉天福六年。成德帥安重榮舉兵叛。南向鄆都。遣杜重威等擊之。過於宗城西。南。重榮敗保宗城。官軍攻拔之。重榮走還鎮州。胡氏曰。宗城東南至魏州百七十里。由宗城東行斜趣至臨清數十里。自南宮東南至臨清亦不過數十里。梁晉爭衝。數邑常爲基坵之勢。

經城故縣

縣東二十里。後漢分堂陽縣。經屬縣。屬安平國。晉因之。後魏省入南宮縣。復尋置。屬廣宗郡。高齊省。隋開皇六年。復置經城。屬貝州。唐仍曰經城縣。宋因之。熙寧六年。省爲經城鎮。屬宗城縣。宋白曰。後漢於今縣西北二十里置經縣。後魏太

和十年。於今縣治。移置經縣。廣宗郡理於此。北齊省郡及縣。嘗移武強縣治焉。後周復於此置廣宗郡。隋開皇三年。郡廢。六年。改置經城縣。宋白所云。今縣。時經城未廢也。○府城廢縣。在縣東南。隋開皇十六年。分經城縣置。屬貝州。大業初。仍省入經城縣。唐武德四年。復置。屬宗州。九年。復廢。

上白城

在縣南。晉建興初。石勒攻乞活帥李暉於上白。斬之。又永和五年。石虎死。張豺專政。謀誅李農。農奔廣宗。帥乞活數萬家保上白。豺遣兵攻之。不能克。○建始城在縣西南。水經注。張甲河經廣宗故城西。又北經建始故城。東田融曰。後趙立建興郡。治廣宗。又置建始。興德等五縣。隸焉。魏收志。廣宗縣有建始。建德等城是也。

漳水

舊在縣西。水經注。漳水經經縣故城西。其故津爲薄洛津。劉昭續漢志。經縣西有薄洛津。戰國策所謂河薄洛之水。卽此也。後漢初平四年。袁紹擊公孫瓚軍於薄洛津。卽漳水津矣。又縣舊有大河故瀆。宋元祐四年。河決宗城中埽。七年。趙鼎議修宗城。棄堤塞宗城。口蓋是時大河挾漳而北。注南宮。冀州皆爲水衝云。

張甲河。縣南二十里。舊自清河縣流入。東經冀州棗強縣東。合於涿河。後埋。唐志云。經城西南四十里。有張甲河。神龍二年。刺史姜師度因故瀆。開以利民。

枯涿河。寔字記云。在縣東二十七里。杜佑曰。經城縣界東去清河郡理五十四里。有枯涿渠。北入南宮縣界。古冀兗二州。於此分域。

五橋澤。在縣東。東晉太元十年。劉牢之救苻丕於鄴。慕容垂北遁。牢之追及垂於董塘澗。又疾趣二百里。終五橋澤。中爭燕輜重。爲垂所邀擊。大敗。董塘澗見後曲周縣。

界橋。在縣東。通典。宗城有界橋。後漢初平三年。袁紹及公孫瓚戰於橋南二十里。追至界橋。瓚軍大敗。今一名袁公橋。亦曰界城橋。酈道元云。清河東北經界城亭。東水上有大梁。謂之界城橋。太子賢曰。宗城縣側有古界城。近枯涿水。橋當此水之上。胡氏曰。

水經云。大河右瀆。東北逕廣宗縣故城南。又東北逕界城亭。北又東北逕信都郡武強縣故城東北。蓋於河瀆上作橋也。

桑林。在縣南。唐興元初。朱滔攻田緒貝州。久之未拔。成德帥王武俊。昭義帥李抱真。合兵進救。距貝州三十里。武俊先伏兵於桑林。合戰。伏發。滔大敗。走德州。胡氏曰。桑林在經城縣西南。○唐店在縣南。五代梁乾化二年。鎮冀將王德明自臨清攻宗城。下之。

梁魏州帥楊師厚伏兵唐店。邀擊德明。大敗。卽此。

廣平府。東至山東臨清州百五十里。東南至大名府百二十里。西南至河南彰德府百八十里。西至河南磁州百二十里。北至順德府亦百二十里。自府治至京師一千里。

禹貢冀州地。春秋時屬晉。爲東陽地。晉人自山以東。謂之東陽。自山以南。謂之南陽。後世山東西之稱。蓋昉於此。戰國屬趙。秦爲邯鄲郡地。漢初置。